



**Nunami kapisilinnik tukertitsivinnik pilersitsisoqarsinnaalernissaanik periarfissassat suunersut pillugu Naalackersuisut UKA2022-mut Nalunaarusioqqullugit Inatsisartut aalajangiiffigisassaattut siunnersuut.**

(Inatsisartunut ilaasortaq Siverth K. Heilmann, Atassut)

(Siullermeerneqarnera)

Inatsisartunut ilaasortaq Siverth K. Heilmann qujanaq siunnersuummut inuussutissarsiornikkut nutaaanik periarfissanik eqqarsaasersussasugut.

Demokraatit tunngavippiaatigut isumaqarput, misissussallugu iluatinnaateqartoq, qanoq ililluta nunatsinnut isertitassanik nutaanik periarfissanik pilersitsisinnaanersugut. Aammali Naalackersuisut isumaqatigaagut uani, kapisilinnik tukertitsivinnik pilersitsisoqarsinnaaneranik periarfissat inuussutissarsiortunit pioreersunit ingerlanneqartariaqartoq, arlaata aningaasarsiutigisinnaassallugit takusinnaappagit. Tassami pisortat suliassaringunangimmassuk tamakkuningga misissuinissaq.

Taamaattorli politikkeritut aaliangiisartutullu pingaartuuvoq, qularnaassallugu, inuussutissarsiortut eqqortunik sinaakkuteqarnissaat. Tamanna tunngavigalugu silatusaarnertut isikkoqarpoq Naalackersuisut allannguutissatut siunnersuutaata suliareqqinnissaa, taakkuunami immamilu kapisilinnik tukertitsivinnik pilersitsisoqarnissaanut inatsisitigut sinaakkutissai misissorusummatigit. Misissuinarneq taanna pingaartuuvoq, taamaasillutik namminersortut periarfissanik misissuisinnaalissammata neriulluarnartumik aallaaveqarluni pilersaarutip iluatsilluarnissaanut soorlu assersuutigaluguunami kapisilinnik tukertitsiviliornermut.

Taamatut oqaaseqarlua siunnersuut Aalisarnermut, Piniarnermut Nunalerinermullu ataatsimiitaliami suliareqqinneqarnissaanut innersuupparput.